

# Ibru

## Lovoang Ti Limixin Me Ibru

**Levelinga Loklox Axasep**

**Levenmaares 67-69 A.D.**

Se ne Iesu ga urut uto vana at laxalibet, lavantun sangaun mi lavalimo levenmaares ga men pe i la lara ga malagan i na lovoang tinedi limixin me Judaia, diga so asen bok di do leme Ibru. Laradi ga malagan i na lovoang kopmen neni goxo malagan li laasen teren. Na limixin me Ibru nedigana nuunu at ne Iesu, la lentaba luvuttadi diga lox asongot di la diga doma i do dinamlong ti loklok at lotu atnedi me Judaia la dina ke xepe lunuunu atdi keneng at ne Iesu Karisito. Laradi ga malagan i na lovoang tinedi ga vaase pe di do nemen di, guta mu asu i na. Ne Iesu Nitna ne Moroa neni mun i silok ti ne Moses; ne Iesu neni lamgomgo ruturun at lotu, neni im gomgo nga nedigana luvuttadi di lok leven gugu at lotu. Lara langas mo ga nemen kusu ti sev amet lempanga mi lavanuet kangkedek atdi xusu dinam taba min ti ne Moroa, anai ni lenep at lekabus migomgo, ketla ne Iesu ga lok kepe mo loklok, neni ga vot at na lavatbung menemen kusu ri lok pes laxapmek basinge dik, neni ga met la ga raba labantuxu ren. Laradi ga malagan na lovoang ni ga lox axasep na langas tinedi xusu nedigana noxo repes basinge ne Iesu, ketla dinam tembeng atmatkun teren.

**Lengkot silok keneng at na lovoang:**

- 1:1-4 Moroa ga tu asuvos min tidik keneng at ne Nitna.
- 1:5-2:18 Karisito neni i silok tinedi lubungangelo.
- 3:1-4:13 Karisito neni i silok ti ne Moses.
- 4:14-7:28 Karisito neni i silok ti lubungmaasa.
- 8:1-9:28 Lekabus maxat ne Karisito ga lox i, ni i silok ti lekabus migomgo.
- 10:1-39 Lada at ne Karisito i silok aleng ti lada at lempanga mi lavanuet kangkedek atdi.
- 11:1-40 At lunuunu mun nedik tabak mokso.
- 12:1-13:19 At lurutu alolos mun atdik, nedik ata nuunu mun at ne Karisito la ata ronga res teren.
- 13:20-25 Levelinga loklox abeese.

### Nitna ne Moroa I Silok Ti Lubung Angelo

**1** <sup>1</sup>Ganoxa ne Moroa ga vaase ri lavalabat atdik at levenngusno nedii lavaeme vapaase alii, at levengkonaleng getgesara la at leventaangas axap. <sup>2</sup>Ketla at na levenaleng melemu at lovotpot at ne Iesu, Moroa ira paase nga ridik limixin nuunu at lungusno ne Nitna. Neni ga soxolik ka i xusu naba ruuna ka levempanga axap, la keneng at ne Iesu, ne Moroa ga rudum li levempanga axap. <sup>3</sup>Ne Nitna i loxasuusu lisisixam at ne Moroa la ni lampenaxa rinotno ren. Ne Nitna i lok tatao levempanga axap at na lavatbung menemen la mo levempanga i mumu asu levelinga ren i lolos aleng. Neni ga lok langas ti limixin kusu dina dadat basinge laxakapmek; melemu at na, nenii ga xis to at lekngen tino at ne Moroa i silok to vana at laxalibet. <sup>4</sup>Kuren la nenii ga ruuna ka lixitkis silok mavana at lubung angelo, kerekngan mo laasen nenii ga ruuna ka vam i, ni laasen i silok tidi.

5 Moroa goxo vaase ri tara ta angelo do,

“Nenu ne Nuruk, ningina nenia a lok ngan ne Tamam.”

*Sam 2:7*

La ni goxo vaase mumu taangelo xeretna,

“Nenia aba lok ngan ne Temen, la neni ba lok ngan ne Nuruk.”

*2 Sml 7:14*

6 La at loxonaleng ne Moroa ga riki asi lamdak avot teren ude xopok ti na lavatbung menemen, nenii ga lok,

“Lubung angelo axap tarak dina lotu saparav i.”

*Len 32:43*

7 Moroa ga vaase mumu lubung angelo la neni ga lok,

“Nenia a lok lubung angelo rak dip tava soso mene ngan lamanman, la nedii di lok ngan lavasaxaruki rak la di lolos ngan levenbabao at laxao.”

*Sam 104:4*

8 Ketla neni ga lok ti ne Nitna xeretna,

“Nenu ne Moroa, lixitkis orong taram naba nemen amisik la amisik la nenu uba lok limixin axap kusu diba mu asu loklok mokmokso ram.”

9 Nenu u vavara aleng ti lomokmokso la u xopara ri laxakapmek; kuren la Moroa, ne Moroa ram ira suxa aumsu vam u mi lomomo i silok aleng, mo i volo lomomo atnedi larapen tangas taram.”

*Sam 45:6,7*

10 Neni ga lok bok ti ne Nitna xeretna,

“Nenu Leeme Silok, ganoxa at lereot uga rudum li lavatbung menemen mi laxalibet mi lukngam. <sup>11</sup>Na levempanga uga rudum li di, naba sonao la diba lok ngan lempanga gamasa, ketla nenu uba rooro amisik. La dinaba rem teterek ngan labantamon. <sup>12</sup>Uba vegun pes di ngan labanmo mikmidi, la ngan lavanga singsiga uba soxun kepe i, ketla nenu xopmen unak lox ekun lodoxoma ram, la kopmen bok taxavaxap at lorooro ram.”

*Sam 102:25-27*

<sup>13</sup>Moroa goxo vaase ri tara atnedi lubung angelo xeretna do,

“Una xis de at lakngak tino, se nenia aba lok neddi munepen minu,  
ngan loxot burubut ti luxangkedek taram.” *Sam 110:1*

<sup>14</sup>Lubung angelo neddi leventoonan avukat mun, dik lok tooro ne Moroa;  
la nenii ik sak tiki di rik lok tooro neddi limixin ne Moroa ga soxolik ka  
vam di xusu dinaba lok kaka loklox arooro.

### Minam Tebeng Lulos Lunuunu Atnimi

**2** <sup>1</sup>Nitna ne Moroa ga raba dik mi loklox arooro, kuren la minam  
tebeng lulos lunuunu atnimi mumu mo levenanasa miga ronga ka  
vam i, kusu mi noxo soogong basinge mo lunuunu. <sup>2</sup>Lubung angelo diga  
raba ne Moses mi Lenavolo la ixo epovo do tara na los polo i. Do nege  
ga ronga xepe i xopla goxo mu asu i, neni ga ba lok ka losongsongot  
ga epovo at loklok teren. <sup>3</sup>La kerepmo bok do nedik ata ronga xepe  
Lagale Lavavang, ixo epovo do nedik taba sepsu basinge lebelemamao  
at ne Moroa. Leeme Silok neni avot ga ru ka lavavang at langas ti loklox  
arooro, la neddi luvuttadi vavang diga ronga xaka mo levelinga ren, la  
diga lox aruturun i ridik. <sup>4</sup>Moroa ga lox asuuus box i do mo levelinga ren  
i ruturun mi leveloklok katling la levempanga sangsangu la leventamtaba  
at Loroongan Kaala, ne Moroa gara epes pam limixin teren min, ga epovo  
at lavavara ren.

### Iesu Ga Ravasu Ngan Limixin

<sup>5</sup>Moroa goxo lok li lubung angelo xusu dibam gomgo ri limixin ap mo  
lemenemen move naba vot melemeu, na nema ma paase momu i. <sup>6</sup>Ketla  
limixin at ne Moroa dibam gomgo ri lavanga axap kerekngan lara ga tong  
i keneng at Lovoang Kaala; i lok keretna,

“Ua lavasuun teren la nenu ne Moroa u doxoma mu solo limixin, la  
labalam ik lok mu laxamdak atdi? <sup>7</sup>Nenu uga raba limixin mi levenasen  
silok, ketla ik lok maxopok kakalik at lubung angelo, la uga lox anarong di  
mi lixitkis silok kusu diba ruuna ka leemi asu la loklok ngangao. <sup>8</sup>Uga tong  
li i do una lox asilok di xusu diba lok tatao mo levempanga axap.” *Sam 8:4-6*  
Ne Moroa ga lok li levempanga axap maxopok at loklok tatao atdik,  
kopmen goxo ke xepe tavanga. Na lingina kovisi nedik ata ven i do  
levempanga ik lok maxopok at loklok tatao atdik. <sup>9</sup>Ketla nedik ata ven  
kibis i do ne Iesu neni ga ruuna lixitkis silok tinedi lubung angelo, la ne  
Moroa ga lox asi lixitlik mun i maxopok atdi xusu na xip lumumuat at  
lanmet ti lox asuuus lodoxoma at ne Moroa do limixin axap diba lok ka  
lorooro avolo. Kuren la lingina Iesu ira lok ka vam lixitkis silok la limixin  
di lok ngangao ren.

<sup>10</sup>Gak mokso do ne Moroa, neni ga rudum li levempanga axap la i lok  
tatao bok di, do neni na ke xepe ne Iesu xusu neni na xip laxasongsongot

kusu na lox agagas avukat ti lugugu ren. Kuren la nenii ga ruuna ka laasen do Lamgomgo at langas ti loklox arooro la ga lok ka bok buaang limixin kusu dina ruuna ka loklox arooro. <sup>11</sup>Ne Iesu eburu minedi limixin ni ga lox adadat di, dik lok keneng at legesa xitkis koetemen. Kerepmo la ne Iesu nenii i lok momo aleng ti tong di do luvutneton. <sup>12</sup>Neni ga lok ti ne Moroa,

“Nenia anaba tong asu laasen taram ti luvutnetak la anabak pixan emi asu minu ro melamgo at lovotpot buru atdi.” Sam 22:22

<sup>13</sup>La ne Iesu ga lok bok,

“Aba nuunu at ne Moroa kerekngan di.”

Ais 8:17

La ga lok bok,

“Nenia na, ak lox eburu mi limixin ne Moroa ga raba ia midi.” Ais 8:18

<sup>14</sup>I ruturun do nedii luvuttadi mun, la kerepmo ne Iesu ga vee radi xusu at lanmet teren nenii naba sele utut kepe lololos at ne Satan, mo ik lok limixin kusu dinak marat at lanmet. <sup>15</sup>Ketla ne Iesu ga lox asepmus di basinge loxokoxo at ne Satan, mila at lorooro axap atdi xeneng ap mo loxokoxo, digak marat at lanmet. <sup>16</sup>La na nedik ta ven kibis i do nenii goxo vot ti lok tooro lubung angelo, ketla nenii ba lok tooro nedii di ruuna lunuunu ngan ne Abaram. <sup>17</sup>Kuren la na lavasuun teren la nenii ga vee radi at lorooro axap teren ngan luvutneton kusu nenii ba ravaasu ngan laradi ga umsu mi lebelemumu la laradi ruturun at lugugu at lamaasa gomgo ri ne Moroa, la ga ravaasu ngan laxaavuk kusu ne Moroa na doxoma xepe laxakapmek at limixin. <sup>18</sup>Neni xa ga xip lumumuat at loxonaleng ne Satan ga lok tong pen i, ketla ne Iesu goxo subu, kuren la nenii i epovo na lok tooro nedii di ekip tangarang mi leveloklok tong pen.

### Iesu I Silok Ti Ne Moses

**3** <sup>1</sup>Luvutnetak mi luvurinuk. Nemi bok lavaanat soxolik at ne Moroa mo ga ro ka vam nimi ngan limixin teren. Kuren la mo levempanga ne Iesu gak lox i, ni na veve mam pixan amisik tidik. Iesu, nenii Luun Pavang la Lamaasa Gomgo. La na nedik dira nuunu ren. <sup>2</sup>Neni ga ruturun ti ne Moroa mo ga soxolik ka i ri lugugu ren, kerekngan ne Moses ga ruturun ap mo levenaleng nenii gak lok tataao limixin at ne Moroa. <sup>3</sup>La ne Iesu ga ruuna ka laasen i silok ti ne Moses, kerekngan mun laradi gugu gu, nenii i ruuna laasen silok ti mo loogu nenii i lox i. <sup>4</sup>Na i ruturun mila levenabung mixin getgesara di ruuna lara laradi ga lok li di; ketla ne Moroa ga lok li levempanga axap. <sup>5</sup>Moses ga ruturun ngan laradi gugu ri lok tataao limixin at ne Moroa la nenii ga paase asu levempanga ba vot melemu. <sup>6</sup>Ketla ne Karisito i ruturun at lugugu ri lok tataao limixin at ne Moroa xerekngan lanarong i lok tataao libibinat teren. Do atam tebeng lolos lunuunu attik la tana ngangais mi lomomo ri lomlong teren, i lox asuuusu i do nedik limixin at ne Karisito.

### Loklok Mamana Ri Limixin At Ne Moroa

7 Nedik limixin at ne Karisito, kuren la nemen mita ronga xepe levelinga ren. I ngan levelinga at Lovoang Kaala, Loroonan Kaala ga vaase i xeretna,

“At na loxonaleng do mina ronga levelinga at ne Moroa, 8 nemen gat mita lox alolos lebelen nimi xerekngan lavalabat atnimi diga ronga xepe ne Moroa ap mo levenaleng ne Moroa ga lok tong pen lunuunu atdi ro at lamatbin.”

*Sam 95:7-8*

9 La ne Moroa ga lok keretna,

“Lavalabat atnimi diga lox amusax ia ro at lamatbin, la at lavanuet sangaun maares diga ven levempanga sangsangu nenia aga lox i. 10 Ana i lavasuun teren la nia aga belemamao limixin ap mo loola. La aga lok, ‘Lebelen di i onon petpes amisik basinge ia, la kopmen ta dinaklen leventaangas tarak.’ 11 Kuren la aga vangpe at lumukmusak tarak do, ‘Di noxo vubeles tinotno at loxot loklok mamas tarak kusu dina rooro avukat.’

*Sam 95:9-11*

12 Luvutnetak mi luvurinuk. Mina lok tatao avukat nimi xusu tara atnimi noxo ruuna taxakapmek la loklok ting tonga xepe levelinga at ne Moroa xeneng at lorooro ren, la kerepmo na sok tixirixes kepe ne Moroa, mo i rooro. 13 Ketla at na levenaleng nemi move mi rooro ren, mina epang aru xusu laxakapmek noxo solo arup tara atnimi la lebelen na repe ri levelinga at ne Moroa. 14 Nedik tabat kis esogo mi ne Karisito do nedik tam tebeng lolos lunuunu se at laxavaxap at lorooro atdik, kerekngan nedik taga nuunu ruturun ap mo levenaleng taga lok kaka lunuunu maxat. 15 I lok ngan Lovoang Kaala i tong i do,

“At na levenaleng do mina ronga levelinga ren, nemen gat mita lox alolos lebelen nimi xerekngan nedii lavalabat atnimi diga ronga xepe ne Moroa.”

*Sam 95:7-8*

16 Nege di nom diga ronga laxaka at ne Moroa la melemu diga ronga xepe i? Nedi mo limixin me Israel, ne Moses ga lam asu ka di boro Isip. 17 At lavanuet sangaun maares diga lok laxakapmek la diga raba arulu ne Moroa. Kuren la ne Moroa ga musak di la buaang atnedi diga remet eteke mun to at lamatbin. 18 La ne Moroa ga vangpe do di noxo vubeles tinotno ri mo loxot loklok mamas teren, mila diga ronga xepe levelinga ren. 19 Kuren la nedik di ven i do buaang atnedi di goxo lox epovo i xusu dina vubeles mila di goxo nuunu at ne Moroa.

### Loklok Mamas Ti Limixin At Ne Moroa

4 1 Lumusaragu move i rem suang kusu ri pubeles ti mo loxot loklok mamas teren; kuren la mina lok tatao avukat nimi xusu teventaba atnimi di noxo subu kot ti mo loklok mamas. 2 Nemi bok mig a ronga Lagale Lavavang

kerekngan nedig diga ronga i. Ketla mo lavavang diga ronga i, goxo lok tooro di mila di goxo nuunu ren. <sup>3</sup>Mo nga nedik dira nuunu vam, i lok ngan ta do tara vubeles pam ap mo loxot loklok mamas kerekngan ne Moroa ga tong i do,

“Kuren la aga vangpe at lumukmusak tarak do, ‘Di noxo vubeles tinotno at na loxot loklok mamas tarak.’” Sam 95:11

Ketla lugugu ren gara xap pam ga ru ka i at luruntudum li at na lavatbung menemen. <sup>4</sup>To xeneng at Lovoang Kaala ne Moroa ga vaase mumu laaleng sepsev avanuti mi na levelinga,

“At laaleng sepsev avanuti, Moroa ga lox amas basinge leven gugu axap teren.” Lur 2:2

<sup>5</sup>La ap mo levelinga a tong pam i, i lok bok keretna,

“Di noxo vubeles tinotno ri loxot loklok mamas tarak.” Sam 95:11

<sup>6</sup>I ruturun do leventaba move diba vubeles ap mo loxot loklok mamas.

Lanedi gano diga ronga Lagale Lavavang, di goxo vubeles teren mila diga ronga xepe levelinga at ne Moroa. <sup>7</sup>Kuren la ne Moroa ga lok katling bok lara laaleng, ga soxor i do ningina. La at leventaba levenmaares melemu at lavatpas su at leeme Israel boro Isip, neniga vaase at lungusno ne Devit kerekngan levelinga neniga tong i gano, ga lok keretna,

“At na loxonaleng lingina, do mina ronga laxaka ren, nemen gat mita lox alolos lebeleni nimi.” Sam 95:7,8

<sup>8</sup>Do ne Josua gita raba di mi loklok mamas ap mo levenaleng neniga lam abeles limixin uto Kanan, Moroa xopmen gixo vaase bok ba melemu mumu taaleng petpes, kusu nedik taba lok ka loklok mamas teren. <sup>9</sup>Loxonaleng ti vubeles to xeneng at loxot loklok mamas at ne Moroa move i rem suang ti limixin teren. <sup>10</sup>Do tara i ruuna loklok mamas at lorooro ren, neniga ira on basinge vam lugugu axa ren at na lavatbung menemen. I lok ngan ne Moroa ga lok mamas basinge lugugu ren. <sup>11</sup>Kuren la mina raba axap lodoxoma atnimi xusu mina vubeles ap mo loklok mamas la kopmen tara noxo subu kot la na mu asu lampoovo atnedi leme Israel, diga raba arulu ne Moroa.

<sup>12</sup>Levelinga at ne Moroa i ruuna lorooro la i lolos aleng; i lok ngan lavarise i anan evan, mo i tara xoxorop laranin etudum la laramomodong atdik; la kerepmo bok levelinga at ne Moroa i pubeles uto xa xeneng at lodoxoma la lorooro atdik kusu na lox asu leveloklok kakapmek; kuren la nedik toxo epovo xusu ata lipe at lemeren ne Moroa, neniga ikleklen levendoxoma atdik la levesumsuma at lebeleni dik. <sup>13</sup>Kopmen tevempanga at na lavatbung menemen axap i epovo na nemen aliye at lemeren ne Moroa. Neni ne Pen Axasep la i reven leveloklok axap at limixin dim doma i xopla dim suma i, la neniga naba lok li limixin at lavapaase mumu mo leveloklok.

### Iesu Neni Lamaasa Avolo

<sup>14</sup>Nedik di ruuna Lamaasa Avolo, neniga urut pam uto vana at laxalibet, la mo nga it kis at lekngen tino at ne Temen. Neni ne Iesu,

Nitna ne Moroa. Kuren la nedik atam tebeng lolos mo lunuuu atnedik tagara ruuna ka vam i.<sup>15</sup> Mo Lamaasa Avolo atdik, neni i epovo na suma rooro dik at leveloklok tong pen mila neni ga suma bok laxaloklok tong pen ngan dik, ketla neni xopmen goxo lok taxakapmek.<sup>16</sup> Kuren la nemen dik guta marat kusu tana vot pasa ne Moroa mi lodomdoma atdik mila neni i umsu mi lebelemumu la nedik taba ruuna ka letaba nabalamu ren la loklok tooro do nedik atak pakes tin.

**5** <sup>1</sup>Lavamaasa amgomgo axap Moroa i soxolik ka di xantubu at limixin kusu dina ru katling di at lugugu at ne Moroa. Dim taba leventamtaba ri tong loklox avukat ti ne Moroa la diplavang bok mi levempanga mi lavanuet kangkedek ti laxakapmek at limixin.<sup>2</sup> Lamaasa gomgo im suma leveloklok tong pen, kuren la i epovo do ni na suma rooronedi di lok laxakapmek mila kopmen dinaklen i do mo levempanga i lok kapmek.<sup>3</sup> Ni lavasuun teren la lamaasa gomgo naba lok laplavang mi levempanga ri laxakapmek axa ren, la ri laxakapmek bok at limixin.

<sup>4</sup>Kopmen na epovo do tara na lok ka mo lugugu mi lavavara mun teren, ketla ne Moroa xa naba soxolik ka i ngan neni ga soxolik ka ne Aron.<sup>5</sup> La ne Karisito bok kopmen goxo xip ka mo lugugu silok at lamaasa gomgo mi lavavara ren. Ketla ne Moroa ga lok tin keretna,

“Nenu ne Nuruk, ningina nenia a lok ngan ne Tamam.” *Sam 2:7*

<sup>6</sup>La at loxot petpes at Lovoang Kaala Moroa ga lok bok tin keretna,

“Nenu Lamaasa Avolo ngan ne Melkisedek, la kopmen taxavaxap at lugugu ram.” *Sam 110:4*

<sup>7</sup>Ap mo levenaleng ne Iesu ga rooro ren at na lavatbung menemen, neni ga sing eburu mi lerengteng silok ti ne Moroa do na lox arooro i basinge lanmet, la ne Moroa ga sepo lisgingising teren la ga lox alolos i mila neni ga lox asi i maxopok at lavavara at ne Moroa.<sup>8</sup> I ruturun do neni ne Nitna ne Moroa, ketla mo losongsongot neni gap kiv i, ga lox epovo i xusu na mu asu lavavara at ne Temen.<sup>9</sup> Kerepmo la ne Moroa ga lox agagas li i, la neni ga ravausu ngan ta lavasuun at lorooro avolo rinedi ding tonga res teren,<sup>10</sup> la ne Moroa ga lok li i ngan Lamaasa Avolo ngan ne Melkisedek.

### Nemen Mita Subu Kot Kantubu

<sup>11</sup> Ma ruuna laxalinga solo momu ne Iesu ngan Lamaasa Avolo, ketla naba lolos ti mus na levelinga rinimi mila lodoxoma atnimi kopmen na gagas ti lok ka na levenanasa.<sup>12</sup> At na levenaleng i epovo do mina lok ka lugugu ri anasa limixin mi levelinga at ne Moroa; ketla kopmen mina epovo mila move mik pakes kusu tara na lox ase amu manga nimi mi levenanasa avot at levelinga at ne Moroa. I lok ngan ta do nemi move mi lok ngan lubung kadede, di tus at luvutnen di; kovisi mina epovo kusu mina anan leveluxa lolos.<sup>13</sup> Lara do i rooro mi ladan tus at nenen,

i ngan laxadede; i lok ngan ta do nemi xovisi mina ven kibis levempanga i lox avukat la levempanga i lok kapmek. <sup>14</sup>Ketla tinedi dira mukun pam at lunuunu atdi, di epovo dina ven kibis levempanga i lox avukat la levempanga i lok kapmek, mila dik lok kaka amisik levelinga at ne Moroa.

**6** <sup>1</sup>Kuren la nemen mitam tebeng mun mo levenanasa miga lok ka avor i, i lox avukat kusu mina lolos ti lok kaka levenanasa at ne Karisito kusu miba ravausu ngan limixin mukun. Mina ke be mo levenanasa avot, i lok keretna, laanasa mumu loklok ti leeng basinge laxakapmek kusu mo laxakapmek noxo loxasuusu lanmet; laanasa mumu lunuunu ri ne Moroa; <sup>2</sup>laanasa ri lesep susu; laanasa ri loklok ti sa li levengkikngen mavana at teventaba rik lox anarong di; laanasa ri laxakatu kaxat basinge lanmet; la laanasa ri lugugu at ne Moroa ngan laradi rongtonga linga at laaleng ete. <sup>3</sup>Do ne Moroa na mulus, mina ke be na levenanasa la mina lok kaka be mo levenanasa mumu.

<sup>4-6</sup>Nedi limixin diga ronga Lagale Lavavang la diga nuunu ren la digara suma vam lomomo at lorooro avolo la digara lok ka vam Loroonan Kaala, la digaraklen pam lorooro nunuan ne Moroa ga vaase alii min ti limixin, la digara ven pam ne Moroa ga lok levempanga sangsangu; do mo limixin dina raba arulu ne Moroa, ixo epovo xusu dina leeng basinge mo laxakapmek mila ap mo mun loklok i lok ngan ta do nedu xa dira vaxaremamu manga ne Nitna ne Moroa ro at laxaba, la kerepmo dira lok li manga i at lainmangan to at lemeren limixin.

<sup>7</sup>Lavapaase poovo mumu i na loklok i lok keretna. Laxantaamang do larakabu it pot amisik teren la i loxasuusu levempipisik nunuan naba lok tooro nedu di gugu i, la mo laxantaamang naba ruuna ka loklox anarong at ne Moroa. <sup>8</sup>Ketla do livin gagas mi laxampivilis kapmek kusuk mun na su ap mo laxantaamang, mo laxantaamang i lok kapmek axap, la i nemen maxopok at lebelemamao at ne Moroa, la kopmen bok ba tara noxotlo tevempanga go.

<sup>9</sup>Larapen tangas tarak. Ma paase lolos tinimi xetla nemen mita doma solo i nom, mila ma nuunu ruturun do leveloklok i nunuan naba ravausu atnimi, mo levempanga naba loxasuusu i do mira lok ka vam loklox arooro. <sup>10</sup>Moroa neni laradi mokmokso la neni noxo domampe leveloklok nunuan nemi miga lox i, la mo labalamu nemi miga loxasuusu i at laasen teren ap mo levenaleng miga lok tooro limixin teren la move mik lok tooro di. <sup>11</sup>Nema ma vara i do nemi getgesara mina loxasuusu leveloklok kerepmo se at laxavaxap at lorooro atnimi, la kerepmo miba ruuna ka ruturun mo leveloklox anarong mim doma ngangais tin. <sup>12</sup>Ma xopara i do mina molo at lunuunu atnimi xetla mina mu asu loklok atnedi lavalabat atnimi diga tu lolos amisik at lunuunu atdi la digat kis tangais mo leveloklox anarong ne Moroa ga paase alii min tidi.

### Lavapaase Alii At Ne Moroa Naba Sorun

<sup>13</sup>Ap mo laaleng ne Moroa ga lok lavapaase alii ren ti ne Abaram, neni ga vara i do na lox amumuat levelinga ren, ketla goxopmen tara ga silok tin kusu neni naba vangpe min; kuren la neni ga vangpe xa mi laasen teren. <sup>14</sup>Mo lavapaase alii ren ga lok keretna, “At laasen tarak nia anaba lox anarong u, la livipistik li ram dinaba umsu aleng.” <sup>15</sup>La ne Abaram gat kis atnaasan mun la ga ngangais ne Moroa, se ni ga lox asorun mo lavapaase alii rin.

<sup>16</sup>Do tara i vara na vangpe, neni na vangpe mi laasen at laradi i silok tin; la mo lavangpangpe naba lox amuat levelinga ren. Lavangpangpe i epovo ri lox axap leven ekarakat. <sup>17</sup>La ne Moroa ga vara i do limixin teren dibaklen tuturun i do neni naba lox epovo levelinga ren tinedi la diba ruuna ka leveloklox anarong neni ga vaase alii min tidi; kuren la neni ga lox amuar i mi lavangpangpe. <sup>18</sup>Legepu vanga mo ik lok kusu na lox amuat levelinga ren, i lok keretna; lavapaase alii ren la lavangpangpe ren, la ixo epovo do ne Moroa na xarang limixin. Kuren la ne Moroa ga lox i na xusu na lox alolos lunuuunu atnedi diga on basinge laxakapmek kusu dina rebeng kaka mo levempanga nunuan ne Moroa ga vaase alii min. <sup>19</sup>Nedik takleklen i do ne Moroa naba lox asorun levempapaase alii ren, kuren la lebelen dik it kis aulis ngan lesepang it kis aulis do di sepkaa alis i ro xopok at lavaruat. La kerepmo bok i epovo do nedik tana xis esogo mi ne Moroa no vana at laxalibet; i lok ngan gano lamaasa ga vubeles at loxot i xaala aleng, mo loxot gak lok to melemu at lavatbantamon silok to xeneng at loogu laplavang. <sup>20</sup>La kerepmo bok ne Iesu gamgo ridik uto vana xusu na lok lugugu ngan Lamaasa Avolo kerekngan ne Melkisedek, la lugugu at Lamaasa Avolo noxo xap.

### Melkisedek Neni Lamaasa

**7** <sup>1</sup>Na leeme ne Melkisedek, gano neni loorong silok to Salem la neni lamaasa at ne Moroa i silok aleng. Neni ga ekip tangarang mi ne Abaram at laaleng ne Abaram eburu mi limixin teren digamlong boro at leesep no diga sep kepe leventaba lavaorong silok la limixin atdi; la ne Melkisedek ga lox anarong i. <sup>2</sup>La ne Abaram ga raba ne Melkisedek mi loxot i sev asangaun ap mo levempanga neni ga lok kaka i ap mo lavaorong silok.

Avot, lavasuun at laasen ne Melkisedek do, “Loorong silok at loklok mokmokso,” la laasen bok do loorong silok boro Salem i epovo mi levelinga xeretna, “Loorong silok at lenmila.” <sup>3</sup>Nedik kopmen ataklen leretere at ne temen mi nenen la leretere at lavalabat teren, la dik taxoklen i do diga visix i la ni ga met lingisa. La kerepmo Nitna ne Moroa i lok ngan ne Melkisedek, mo i nemen amisik ngan lamaasa.

<sup>4</sup>Mina doma i do ne Melkisedek ga silok aleng. Ataklen i do nen i ga silok mila ne Abaram, Temen ned i lubungmixin me Israel ga raba i mi loxot i sev asangaun ap mo levempanga ni ga lok kaka i at laaleng nen i ga esep eburu mi lavaorong silok. Mo loxot ga lox avukat aleng. <sup>5</sup>Lenavolo i tong i do livipisik li at ne Levi mo digap kip lugugu ngan lavamaasa, dinak lok ka loxot i sev asangaun boro xa at limixin atdi, keke i do ned i axap mun livipisik li at ne Abaram. <sup>6</sup>Na laradi ne Melkisedek, nen i goxopmen livisik li at ne Levi, ketla nen i ga lok ka loxot i sev asangaun boro at ne Abaram, ni ga ruuna ka lavapaase alii boro at ne Moroa la ne Melkisedek ga lox anarong i. <sup>7</sup>La i ruturun aleng do lara i silok, nen i na lox anarong mo lara i lixilik tin. La kerepmo ne Melkisedek ga silok ti ne Abaram. <sup>8</sup>La ned i limixin me Israel diga raba loxot i sev asangaun ti lavamaasa; mo lavamaasa di goxo rooro amisik, ketla ne Melkisedek nedik kopmen ataklen i do nen i ga met, limixin di lok do move i rooro. <sup>9</sup>I epovo na tong i do ne Levi la lavamaasa melemu ren, dik lok kaka loxot i sev asangaun boro at limixin me Israel, ned i xopmen na silok ti ne Melkisedek, mila lurubuno di ne Abaram ga raba ne Melkisedek mi loxot i sev asangaun. <sup>10</sup>I epovo ana tong i xuren mila ap mo laaleng ne Abaram ga raba ne Melkisedek mi loxot i sev asangaun, i lok ngan ta do ne Levi mi lavamaasa melemu ren diga raba ne Melkisedek mi loxot i sev asangaun, keke i do luvutnen di goxovisi visik di.

### Iesu Neni Lamaasa Ngan Ne Melkisedek

<sup>11</sup>Limixin me Israel di goxo epovo do dina dadat basinge laxakapmek mila xopmen di goxo epovo xusu dina muasu avukat leventaangas la levelinga at lavamaasa mo digak lok at libibinat at ne Levi; mo leventaangas, ni lavasuun at Lenavolo, ne Moroa ga raba limixin me Israel min. Kuren la limixin digak pakes ti lamaasa vetpes kusu na vot, la ba lok ngan ne Melkisedek; nen i noxo lok ngan ne Aron mi lavamaasa at libibinat at ne Levi. <sup>12</sup>La ne Moroa ga soxolik ka Lamaasa vetpes kusu na lox adadat limixin basinge laxakapmek, kuren la nen i ga lox ekun Lenavolo mi lekabus maxat, mila do tara na lox ekun leventaangas at lavamaasa, nen i na lox ekun bok Lenavolo. <sup>13</sup>La mo Lamaasa vetpes, nen i ne Iesu la nen i at libibinat petpes la goxopmen tara ap mo libibinat ga ruuna ka lugugu ngan lamaasa. <sup>14</sup>I xasep do Leeme Silok atdik, nen i at libibinat at ne Juda, la ne Moses kopmen goxo tong i do teventaba at na libibinat naba ravausu ngan lavamaasa. <sup>15</sup>La levelinga atnama mumu lekabus maxat i xasep aleng mila lamaasa vetpes kerekngan ne Melkisedek gara vot pam. <sup>16</sup>Lenavolo i tong i do, ned i mun at libibinat at ne Levi, di epovo xusu dina xip ka lugugu ngan lavamaasa. Ketla ne Iesu ga lok ka mo lugugu at langas petpes. Neni ga lok ka i mila nen i ga ruuna lololos silok la kopmen taxavaxap at lorooro ren. <sup>17</sup>I lok ngan ne Moroa ga tong i at Lovoang Kaala, levelinga ren i lok keretna,

“Nenu unaba nemen amisik ngan lamaasa kerekngan ne Melkisedek.”

*Sam 110:4*

<sup>18</sup> Moroa ga vaxaxis ase Lenavolo at ne Moses mila goxopmen ta tololos teren la kopmen ta goxo epovo ri lok tooro limixin; <sup>19</sup> la Lenavolo xopmen goso epovo na lox adadat limixin basinge laxakapmek. La ne Moroa ga lok li langas maxat, i lox avukat ti Lenavolo la maxeneng ap mo langas maxat, i epovo do tana xis esogo mi ne Moroa.

<sup>20</sup> La ne Moroa ga vangpe do ne Iesu na xip ka lugugu at lamaasa, ketla ne Aron la lavamaasa melemu ren diga xip ka mo lugugu ketla goxopmen tavangpangpe at ne Moroa ridi. <sup>21</sup> Ketla ne Moroa ga vangpe do ne Iesu na lok ka lugugu ngan lamaasa at laaleng ne Moroa ga lok tin keretna,

“Leeme Silok ne Moroa ga vangpe vam la neni noxo lox ekun lodoxoma ren. Ni ga lok, ‘Nenu naba nemen amisik ngan lamaasa.’” *Sam 110:4*

<sup>22</sup> Moroa ga vangpe xerepmo, kuren la ne Iesu neni i lok ngan losoksoxoba pe ri lekabus maxat, mo i nunuan aleng ti Lenavolo.

<sup>23</sup> Buaang atnedi lavamaasa amgomgo diga lok lugugu mila diga vekukun mi lugugu do lara ga met. <sup>24</sup> Ketla ne Iesu, kopmen taxavaxap at lorooro ren la kerepmo neni bak lox amisik lugugu at lamaasa. <sup>25</sup> Kuren la neni i epovo na lox arooro rinotno neddi di vosiga ne Moroa, mo do dina nuunu sogo at ne Iesu; mila ne Iesu naba nemen amisik saparap ne Moroa la na ngising i xusu na lok tooro di.

<sup>26</sup> Lamaasa gomgo xerepmo i lox epovo lavapkakes atdik; luruptuvuk teren i nunuan axap, neni xopmen goso ronga xepe levelinga at ne Moroa, goxopmen taxakapmek gak lok teren. Ap mo levenaleng neni ga nemen de at na lavatbung menemen neni goso vubeles ti laxakapmek eburu mi limixin kapmek; la melemu ne Moroa ga lox asilox i ro vana at laxalibet. <sup>27</sup> Neni xopmen goso lok ngan mo leventaba lavamaasa amgomgo, neddi xa digaplavang amisik ti laxakapmek atdi, la ti laxakapmek bok at limixin; ketla ne Iesu ga lok laplavang ti laxakapmek at limixin axap, ni ga lok legesa laplavang mun, at laaleng ni ga raba lorooro ren kusu na uu nop loklok atdik. <sup>28</sup> Maxeneng at Lenavolo luvuttadi diga lok lugugu ngan lavamaasa amgomgo, la lorooro atdi goxok mokso xerekngan ne Iesu. Ketla ne Moroa ga raba limixin mi Lenavolo, la melemu ni ga vangpe do ne Nitna na lok kaka lugugu at lamaasa gomgo, luruptuvuk teren nabak mokso amisik.

### Iesu Neni Lamaasa Gomgo At Lekabus Maxat

**8** <sup>1</sup> Lavasuun at na levelinga atnama i lok keretna. Nedik ta ruuna lamaasa gomgo xerepmo, mo it kis at lekngen tino at loxonin orong at ne Moroa i silok aleng, to vana at laxalibet. <sup>2</sup> Neni ik lok lugugu at ne Moroa ro xeneng at loxot i xaala aleng mo ik lok at loogu ruturun, kopmen limixin di goso lox i, ketla ne Moroa xa ga lox i.

<sup>3</sup>Nedi axap, lavamaasa amgomgo dip kip lugugu xusu dina raba ne Moroa mi leventamtaba la levempanga laplavang, la kerepmo bok i epovo do Lamaasa gomgo ne Iesu na ruuna tavanga xusu ni na raba ne Moroa min. <sup>4</sup>Do neni gik lok nade at na lavatbung menemen, neni gi toxo ruuna ka lugugu ngan lamaasa mila leventaba luvuttadi mo gik lok pam kusu ri raba leventamtaba ngan Lenavolo i tong i. <sup>5</sup>Nedi di gugu ro at loxot kaala nade xopok at na lavatbung menemen, na loxot kaala neni lampoovo mun ap mo loxot kaala no vana at laxalibet. Ni lavasuun teren la ne Moroa ga vaase lolos ne Moses at laaleng neni ga lok do na xip loogu kadis at ne Moroa, la ne Moroa ga lok tin keretna, “A vara i do una xip avukat na loogu ngan lampoovo nia aga lox ase u min to at lakaana Sinai.” <sup>6</sup>Ketla mo lugugu ne Iesu ga lok ka i, i lox avukat ti lugugu at lavamaasa mede xopok, i ngan bok lekabus maxat i lox avukat ti lekabus migomgo; la leveloklox anarong at lekabus maxat i lox avukat ti leveloklox anarong at lekabus migomgo. La ne Iesu neni lavasuun at lekabus maxat, ni ga lok lumulum kantibu at limixin mi ne Moroa.

<sup>7</sup>Lekabus migomgo goxo epovo na lox axis eburu ne Moroa mi limixin, kuren la ne Moroa ga lok lekabus maxat. <sup>8</sup>Moroa ga ven kibis i do lekabus migomgo goxo epovo mila limixin diga soogong aleng; ni ga lok,

“Mina ronga i na. Laaleng mo naba vot la nia anaba lok lekabus maxat mi limixin tarak to Israel la limixin tarak at libibinat me Juda.

<sup>9</sup>Mo lekabus maxat ba lok petpes ti lekabus migomgo, mo nia aga lox i eburu mi lavalabat atdi ap mo levenaleng nia aga lam asu di boro Isip. Nia aba lok lekabus maxat mila di goxo ruturun ti lekabus migomgo, la nia aga raba arulu di. <sup>10</sup>Nenia ne Moroa, mina ronga na levelinga. Melemu nia anaba lok lekabus maxat mi limixin me Israel. Mo lekabus naba lok keretna; nia anaba lox adoxoma di mi levelinga rak, la anaba buradong levelinga rak keneng at lebelen di. Nia anabat kis esogo midi la anabak lok tatao di ngan limixin tarak. <sup>11</sup>Kopmen bok ba tara naba anasa lentangas teren kopla neton mi levelinga keretna, ‘Unaklen ne Moroa.’ Milanedi axap dinaba xis ekilen eburu minia; nedilimixin silok la limixin gamasa bok. <sup>12</sup>Nia anaba doxoma xepe laxakapmek atdi la nia noxo domangke rinotno bok ba at laxakapmek atdi.” *Jer 31:31-34*

<sup>13</sup>Moroa ga soxot na lekabus do lekabus maxat, kuren la Moroa ga ke xepe lekabus migomgo mila kopmen bok ba tugugu ren la ma lixilik na sonao axap.

### Leveloklok At Lekabus Migomgo

**9** <sup>1</sup>At lekabus migomgo Moroa ga raba leme Israel mi leventaangas kusu dina mu asu i ri lok leven gugu xeneng at lotu, la diga bak kangkan loxot silok ti lotu saparap ne Moroa. <sup>2</sup>To xeneng teren diga xip lara loogu kadis. La keneng ap mo loogu kadis diga lok legepu xonnep

gu; at loxonnep gu avot diga lok li loxot kusu lababao bak lok teren, la loxonin eburu mi levengkongkide gak lok bok teren, mo levengkongkide di etaba min ti ne Moroa. Na loxot diga soxor i do loxot kaala.<sup>3</sup> To melemu at na loxonnep gu, ni lenep gu i sev agepura; diga soxor i do loxot i xaala aleng tino. Lara lavattamon ga merem to xantubu ri lox epeseves mo lunep gu. <sup>4</sup>To melamgo at lavattamon lara loxonin laplavang mo gak lok, diga lox i mi logol la digaplavang go mi levempavaxan una ga so mavak; la to xeneng at loxot i xaala aleng tinotno, lara lobokis bok mo gak lok, diga vop pe i ro maxeneng la maxamang teren mi logol. Mo lobokis ga lok katling lekabus ne Moroa ga lox i eburu mi limixin teren. To xeneng ap mo lobokis lara lavanga lukluxa mo gak lok, diga lox i mi logol, la keneng teren diga lok li levengkoluxa ap mo leveluxa limixin me Israel diga anan i ro at lamatbin; diga so asen i mi lamaana; lakedak bok at ne Aron no ga suudun, gak lok go xeneng, la legepxuron uat no ne Moroa ga malagan li lasangaun Lenavolo ren. <sup>5</sup>To mavana at na lobokis luvanga raptava at ne Moroa mo dugak lox asusu lisisixam silok boro vana at laxalibet, duga tu puvung mo loxot, ua lavamaasa diga sep susu i mi lada at levempanga mi lavanuet kangkedek atdi xusu ne Moroa na doxoma xepe laxakapmek at limixin. Ketla mo nga nia xopmen na epovo kusu ana re axap na levempanga.

<sup>6</sup>Melemu at na, do digara lox agagas li vam na loogu kadis, lavamaasa diga ru ka ba i kusu dina lok leven gugu atdi. Diga pubeles uto xeneng mun at lenep gu avot at levenaleng axap ti lok lugugu atdi ngan lavamaasa. <sup>7</sup>Ketla lamaasa gomgo xusuk mun neni ga pubeles ti mo loxonnep gu maxeneng tino, mo loxot ga xaala aleng tinotno. Neni ga vubeles go at leges aleng mun keneng at legesa maares. Neni goxo pubeles gamasa, ni ga ba pubeles axa eburu mi lada at levempanga mi lavanuet kangkedek. La neni ga lok letaba mi mo lada ti laxakapmek teren la laxakapmek bok at limixin do digara soogong pam, ketla di goxoklen i do mo levempanga ga lok kapmek. <sup>8</sup>Loroongan Kaala i lox ase dik, mumu na lavanga do langas povolo uto saparap ne Moroa goxovisi rem suang, ap mo levenaleng loogu kadis move ga tu. <sup>9</sup>Ana lavanga ni lampoovo mun ti na levenaleng ti lox asusu i do leventamtaba la levelaplavang diga etaba min kopmen goxo epovo na lok kepe loklok mamangan at laxakapmek atnedi diga etaba mi mo levempanga. <sup>10</sup>Mo leveloklok ti laanan la liinin la leventaangas ti sogos panga, mo leventaangas ga nemen mun kusu mo limixin dina momu asu i se at laaleng lekabus maxat ga vot.

### Lada At Ne Karisito

<sup>11</sup>Ketla ne Karisito ga vot ngan Lamaasa Avolo xusu na lox agagas leveloklox anarong at lekabus maxat, ne Moroa im taba limixin teren

min. Neni xopmen goxo vubeles at loogu kadis mede xopok, ketla neniga vubeles uto xeneng at loxot i xaala aleng la i lox avukat aleng no vana at laxalibet, mo loxot limixin kopmen di goxo lox i mi levengkikngen di. Lavasuun at na do mo loxot kopmen nak lok de at na lavatbung menemen la ixo epovo nedik ataba ven i mi levengkatli atdik. <sup>12</sup> Karisito xopmen goxo lok kaka lada at lubulumaxao la at lavatme la ga vubeles min, ketla neniga vubeles mi lada axa ren ti mo loxot ga xaala aleng no vana at laxalibet, la ga lok letaba min at legesa xonaleng mun, ga lox i xuren kusu na un avolo dik mi lada ren la dik ataba ruuna ka lorooro avolo. <sup>13</sup> Lada at laxanme la laxanbulumaxao la laxakup at lanat bulumaxao diga kotos i, lamaasa gomgo ga sep susu limixin min,nedi nom diga lok laxakapmek kusu dina dadat to maxamang mun. <sup>14</sup> Ketla na loklok at lekabus migomgo kopmen na epovo mi mo lavanga ne Karisito ga lox i. At loklok tooro at Loroongan at ne Moroa neniga raba xa i ri ne Moroa ngan laplavang avolo, goxopmen taxakapmek teren, kusu na lox adadat dik basinge laxakapmek mo ba lox asuuus lanmet. Kerepmo i epovo doata mu asu lavavara at ne Moroa, mo i rooro.

<sup>15</sup> Kuren la Karisito, neniga laradi ga lok lumulum kantubu at limixin mi ne Moroa, la at na langas neniga lok lekabus maxat. La nedig ne Moroa gara soxolik ka vam di, diba ruuna amisik leveloklox anarong neniga vaase alii min tidik. Karisito ga met ngan laxaavuk kusu na lox asepmus limixin teren basinge laxakapmek diga lox i ap mo levenaleng diga mumulekabus migomgo.

<sup>16-17</sup> Do temen lara i auret na met, neniga i epes laxamda teren mi levempanga ren, ketla nedig noxo ruuna ka soso mo levempanga do nenig move i rooro. Se do ne temen di na met, i epovo ba do mo laxamda dina ruuna ka mo levempanga at ne temen di. <sup>18</sup> Ni lavasuun teren la lada at lavanga mi lavanuet kangkedek do ga met pam, ga lox alolos lekabus migomgo. <sup>19</sup> Ne Moses ga tong asu vam levenngas linga at Lenavolo ri limixin axap, neniga lok ka lada at levempatnat bulumaxao, la ga lox eburu i mi ladan. La neniga lok lavanga sep susu mi lavatkabinim sipsip diga lox amemele i la mi levengkakan una at luuna isop. Neni ga lok ka lada min la gap sep susu lugun linga at Lenavolo la limixin bok. <sup>20</sup> Moses ga lok keretna, “Na lada neniga loklok katling at lekabus no ne Moroa ga tong i do ata momu asu i.” <sup>21</sup> La at nom langas neniga sep susu loogu kadis la levempanga axap diga lok mo lugugu at ne Moroa min. <sup>22</sup> I ruturun aleng do levempanga axap diga lok mo lugugu min, diga lox axaala di mi lada xerekngan Lenavolo i tong i. La do lada noxo sen, Moroa noxo doxoma xepe laxakapmek at limixin.

<sup>23</sup> Kuren la ga epovo do limixin dina lox adadat mo levempanga at loogu kadis mi lada at levempanga digaplavang min. Ketla mo levempanga at loogu kadis ni lampooovo mun ap mo levempanga no vana at laxalibet. Ketla

mo levempanga ruturun no vana at laxalibet gak pakes ti lada at ne Karisito; la mo lada ren i lolos aleng ti lada at laxanbulumaxao, la mo lada ren ik lox agagas li mo loxot tidik.<sup>24</sup> Karisito goxo lok lugugu ren to xeneng at loxot kaala limixin diga lox i; mo loxot ni lampoovo mun ap mo loxot tuturun no vana at laxalibet. Ketla neni ga vubeles to vana at laxalibet kusu na tu ro at lemeren ne Moroa la na ngising i ri lok tooro dik.<sup>25</sup> Neni ga vubeles uto vana at laxalibet, kopmen tim taba amisik lorooro ren ngan lamaasa gomgo ga pubeles amisik mi lada uto xeneng at loxot i xaala aleng at levenmaares axap, ketla mo lada xopmen lada axa ren.<sup>26</sup> Do ne Karisito gita mumu mo loklok, neni gitaba suma amisik losongsongot, ga ru ka i at lavakpaxaru kaxat at na lavatbung menemen. Ketla at na levenaleng kavaxap, ne Karisito ga vot gesara mun kusu na raba lorooro ren ngan laplavang ti lok kepe laxakapmek la ti lox arooro dik basinge lololos at laxakapmek.

<sup>27</sup> Limixin axap dinaba met la melemu at na, Moroa ba lok li di at lavapaase. <sup>28</sup> La kerepmo ne Karisito ga met gesara mun ngan laplavang kusu na lox adadat buaang limixin basinge laxakapmek atdi; la neni nabamlong bok sev agepura, kopmen ti met nop loklok atdik, ketla neni naba lox arooro rino nedti dit kis tangais i.

### Karisito Ga Raba Lorooro Ren

**10** <sup>1</sup> Lenavolo at leme Judaia ni lampoovo mun ti mo leveloklox anarong at ne Moroa mo naba vot. Lenavolo ni xopmen mo leveloklox anarong. Kuren la mo leveloklok tiplavang diga lox amisix i at levenmaares axap, goxo epovo rinotno xusu na lox adadat nedti diga vosiga ne Moroa kusu dina lotu saparav i. <sup>2</sup> Do gita epovo na lox adadat di, na loklok tiplavang to gita xap pam. Mila mo langas i epovo giba lox adadat tinotno limixin, la kerepmo di gitoxo epovo na suma lainmangan bok ba mumu laxakapmek atdi. <sup>3</sup> Ketla mo levelaplavang ga lox adoxoma mun limixin mi laxakapmek atdi la kerepmo digam suma lainmangan, <sup>4</sup> mila ixo epovo do lada at laxanbulumaxao la laxanme na lox adadat limixin basinge leveloklok kakapmek atdi.

<sup>5</sup> Kuren la ap mo loxonaleng ne Karisito ga lok do na si ude at lavatbung menemen, neni ga lok ti ne Moroa xeretna,

“Labalam goxo ru levelaplavang la leventamtaba, ketla ugam doma gagas kusu uba riki asi ia la anaba vee radi ngan limixin kusu anaba raba u minia ngan laplavang. <sup>6</sup> U goxo lok momo mi leventamtaba diga xotos i ro at laxao la leventamtaba diga etaba min ti lok kepe laxakapmek at limixin. <sup>7</sup> Kuren la aga lok keretna, ‘Moroa. Nenia na. A vot pam ti mu asu lavavara ram kerekngan mo levelinga keneng at lugun linga ram diga malagan i mumu ia.’”

*Sam 40:6-8*

<sup>8</sup> Avot be ne Iesu ga lok keretna; “Labalam goxo ru levelaplavang la leventamtaba gamasa eburu bok mi leventamtaba diga xotos i ro at laxao

la leventamtaba diga etaba min ti lok kepe laxakapmek atdi. La u goxo lok momo mi na loklok.” Keke i do Lenavolo at ne Moses ga tong i do limixin dina mu asu mo loklok. <sup>9</sup>La neni ga lok bok, “Nenia na; a vot pam ti mu asu lavavara ram.” Kerepmo la ne Moroa ga lok kepe mo leveloklok tiplavang megano la ga lox ekun i mi mo laplavang i sev agepura, ne Karisito xa ga lox i mi lada ren. <sup>10</sup>Ne Karisito ga mu asu lavavara at ne Moroa, la neni ga raba lorooro ren ngan laplavang at legesa xonaleng mun kusu na lox adadat limixin basinge laxakapmek atdi.

<sup>11</sup>At levenaleng axap lavamaasa diga tu ro xeneng at loogu kadis la digak lok lugugu at lotu; at levenaleng axap diga etaba mi leges asen panga laplavang mun, mo levempanga goxopmen tinotno na epovo xusu ri lox adadat limixin basinge laxakapmek atdi. <sup>12</sup>Ketla Lamaasa Avolo ga etaba mi legesa laplavang mun ti laxakapmek, u ningina la amisik bok, la melemu neni ga xis to saparap lekngen tino at ne Moroa. <sup>13</sup>Ga ru ka i ap mo laaleng neni ga ngangais ne Moroa na lok li limixin munepen teren ngan loxot burubut ti luxangkedek teren. <sup>14</sup>Karisito ga raba lorooro ren ngan laplavang, kuren la ni ga lok langas kusu limixin dina dadat amisik la na nga ne Moroa ik lok kepe laxakapmek at limixin di nuunu ren.

<sup>15</sup>Loroonan Kaala bok i tong asusu i na; i lok keretna,

<sup>16</sup>“Melemu nia anaba lok lekabus maxat mi limixin tarak; anaba buradong levelinga rak keneng at lebelen di la nia anaba lox adoxoma di mi levelinga rak.” *Jer 31:33*

<sup>17</sup>La i lok bok,

“Nia a noxo domangke rinotno bok ba at laxakapmek atdi.” *Jer 31:34*

<sup>18</sup>La do ne Moroa ira doxoma xepe vam laxakapmek at limixin, kopmen dinak pakes bok ba ri lok laplavang kusu ri lok kepe laxakapmek.

### Langas Maxat Tim Taba Lorooro

<sup>19</sup>Luvutnetak mi luvurinuk. I epovo do ata vosiga ne Moroa ap mo loxot i xaala aleng, mila ne Iesu gara suang pam mo langas mi lada ren.

<sup>20</sup>Mo langas neni langas maxat im taba lorooro, Iesu ga suang pam i ridik ap mo laaleng neni ga raba labantuxu ren kusu na uu at laxaba.

Lavattamon silok to xeneng at loogu kadis ga ru katling labantuxu at ne Iesu la mo lavattamon ga rem lais tubu, i ngan ta do ga suang mo langas tidik. <sup>21</sup>La nedik ta ruuna Lamaasa Avolo, neni lamgomgo ri limixin at ne Moroa. <sup>22</sup>Kuren la mina vosiga ne Moroa do lebelen nimi irak mokso vam la lunuunu atnimi irat matkun pam la lebelen nimi xopmen tusumsuma xapmek teren mila ne Moroa ga lox adadat pam nimi kerekngan di gos labantuxu atdik mi ladan i nunuan. <sup>23</sup>Minam tebeng lolos lunuunu atnimi ri mo leveloklox anarong mo naba vot mila ne Moroa naba lox asorun levempapaase alii ren. <sup>24</sup>La mina doxoma ka teventaangas kusu mina lox axatu lebelen nimi ri elok tooro ela la lorooro atnimi na umsu

mi labalamu la leveloklok i nunuan. <sup>25</sup>Nemen mita ke xepe mo leveloklok tit pot buru, kerekngan leventaba atnimi dira ke xepe vam i. Ketla nemi xa mina epang aru xusu lunuunu atnimi naba lolos; la mina lox amisix i na, mila laaleng ete i auret na vot.

<sup>26</sup>Do tara atnimi ga siam ka vam luruturun at Lagale Lavavang, ketla iramlong ti laxakapmek, i lok ngan ta do i raba arulu ne Moroa la kopmen tavanga laplavang bok ba kusu ba lox arooro i. <sup>27</sup>Ketla nenii ba suma mun lanmarat silok at lebelemamao at ne Moroa at laaleng ete mila laxao bokbolot mo naba anan limixin di munepen mi ne Moroa. <sup>28</sup>Do tara ga los polo lenavolo at ne Moses, la do tegepu radi xopla tavantun tuvuttadi diga venemet mo laradi ga lok laxapmek, nenii gaba met etaba mun. <sup>29</sup>Kerepmo la do tara na sok kepe lunuunu ren at ne Iesu, i lok ngan ta dola i vas axangka ne Nitna ne Moroa; la nenii i lok lada at ne Iesu ngan ta lavanga gamasa, mo lada at lekabus maxat ga sen kusu na lok kepe laxakapmek teren, la ira vaase vupu vam ti Loroongan Kaala, mo i lox asusu letaba nabalamu at ne Moroa ridik. Do tara na lok na leveloklok kakapmek, nenii naba lok ka loklox asongot silok. <sup>30</sup>Ataklen i do ne Moroa xa ga lok keretna,

“Nenia xa anaba sepo laxakapmek at limixin.”

Len 32:35

La ga lok bok,

“Moroa naba vaxaru limixin teren at lavapaase, mo do dina soogong basinge levelinga ren.”

Len 32:36

<sup>31</sup>Naba lok kapmek aleng do tara na ekip tangarang mi lebelemamao at ne Moroa, mo i rooro.

<sup>32</sup>Mina doma amlong ti mo levenaleng miga lok ka avot lunuunu. Ap mo levenaleng miga ekip tangarang mi levenmumuat la leveloklox asongot mumu lunuunu atnimi. Ketla miga tu lolos la mi goxo subu. <sup>33</sup>At lentaba levenaleng diga sok taba nimi mi laxalinga xapmek la diga lox asongot nimi ro melamgo at limixin axap. At leventaba levenaleng bok miga ru eburu mi nedii diga xip mo levesongsongot. <sup>34</sup>Miga balamu nedii digak lok at loogu xokoxo la miga lok momo mene nga do limixin diga sak paxat ka levempanga atnimi mila migaklen i do nemi xa miba ruuna lapnovos i lox avukat aleng no vana at laxalibet, mo lapnovos naba nemen amisik.

<sup>35</sup>Kuren la nemen mita soxepe lunuunu atnimi; do minam tebeng lolos teren, Moroa naba raba nimi mi leveloklox anarong i nunuan aleng. <sup>36</sup>Do mina suma levenmumuat at lorooro atnimi, mina tu lolos at lunuunu atnimi xusu minaba ruuna ka mo leveloklox anarong ne Moroa ga vaase alii min tidik, mo do mina muasu lavavara ren. <sup>37</sup>Kopmen noxo lox abao la Lanarong nabamlong kerekngan ne Moroa ga tong i xeretna,

“Mo lara diga tong i do naba vot, nenii naba vot tuturun, nenii noxok lok sila. <sup>38</sup>Ket do nege laradi do luruptuvuk teren ik mokso, nenii naba ruuna

ka lorooro avolo, mo do nenii nat pas eburu mi lunuunu. La do nenii na raba arulu ia, labalak noxo lox avukat tin.” Abk 2:3,4

<sup>39</sup>Ketla nedik kopmen na lok ngan nedi di raba arulu ne Moroa la dira seeve, ketla nedik ta lok ngan nedi di nuunu at ne Moroa la dira ruuna ka vam lorooro avolo.

### Limixin Diga Nuunu At Ne Moroa

**11** <sup>1</sup>Lunuunu nenii loklok tim doma ngangais ti leveloklox anarong ne Moroa naba raba limixin teren min; la lunuunu ik lox aklen dik ti mo levempanga nedik kopmen ta reven tu ren. <sup>2</sup>Kerepmo la ne Moroa ga emi asu minedi lavalabat atdik gano, mila diga ruuna lunuunu.

<sup>3</sup>Nedik ta ruuna lunuunu, kuren la ataklen i do ne Moroa ga rudum li levempanga axap mi levelinga ren, la ataklen i do levempanga nedik di ven i mi levengkatli atdik ga ravaasu at levempanga nedik goxo ven i.

<sup>4</sup>Abel ga ruuna lunuunu, kuren la nenii ga raba ne Moroa mi laplavang ga lox avukat ti laramtaba at ne Kaen. Abel ga ruuna lunuunu, kuren la ne Moroa ga emi asu min la ga raba i mi laasen do laradi mokmokso, ap mo laaleng ne Moroa ga siam ka leventamtaba ren. Lunuunu ren move i ngan lampoovo ridik kusu ata momu asu i, keke i do nenii ga met pam.

<sup>5</sup>Enok ga ruuna lunuunu, kuren la nenii goxo met, ketla ne Moroa ga lok ka i uto vana at laxalibet, la limixin diga puse rin la di goxo vuse ka i, mila ne Moroa ga lam ka vam i uto vana. Avot at na, Moroa ga emi asu min, mila loklok teren ga lox amomo i. <sup>6</sup>La mo do tara xopmen tunuunu ren, ixo epovo ni na lox amomo ne Moroa, mila do tara i vara na vot pasa ne Moroa, nenii na nuunu do ne Moroa mo i rooro la nenii i epovo naba lox anarong nedi lebeleni di i ngaongao xusu dinaklen ne Moroa.

<sup>7</sup>Noa ga ruuna lunuunu, kuren la at laaleng ne Moroa ga tong i rin do laran naba vot, ni ga ronga res la ga lok lavattaaxup silok kusu na lox arooro nedi loxoetemen. Nenii ga ruuna lunuunu la kerepmo ga lox asuuus i do loklok at limixin ap mo levenaleng ga lok kapmek, la nenii ga ravaasu ngan laradi mokmokso at lemeren ne Moroa mila nenii ga ruuna lunuunu saparap ne Moroa.

<sup>8</sup>Abaram ga ruuna lunuunu. Kuren la at lara laaleng ne Moroa ga tong i rin do na on basinge lemenemen teren kusu nat pas ti lara lemenemen to vaxalom; Moroa ga vaase alii rin do nenii naba raba i min melemu ngan lemenemen tino rin. La ne Abaram ga ronga res teren la ga vas kaxat, nenii goxoklen i do mo lemenemen gak lok ua. <sup>9</sup>Nenii ga ruuna lunuunu la ga lox araut lemenemen tin ap mo loxot ne Moroa ga vaase alii min tin. Ketla ap mo lenep nenii ga nemen ngan laradi xadiong, gak lok mun at loogu kadis, la melemu ne Aisak, nitna ne Abaram, la ne Jakop, tubuno ne Abaram dugak lok bok at laraugu kadis. Nedu bok duga ruuna mo lavapaase alii boro at ne Moroa ngan ne Abaram. <sup>10</sup>Nenii ga

ronga res mila neni gam doma ngangais ti mo lemenemen silok, bak lox amisik la ne Moroa ga lox agagas mo lemenemen silok ti limixin teren.

<sup>11</sup> Abaram ga ruuna lunuunu, keke i do gara sioxo vam, la latkin bok teren ne Sera goxo epovo do na visik, ketla nedu duga visik lara lamdak. Kuren la ne Abaram ga ravaasu ngan ne temen mo lamdak, mila ne Abaram ga nuunu do ne Moroa naba lox asorun lavapaase alii ren. <sup>12</sup> La ne Abaram, neni lasioxo nga, ketla ga buaang aleng livipisik li ren, ga umsu aleng ngan laxampenti mede vana la laxangkaneng to loxon, nedik taxo epovo ri exes di, na livipisik li ga ravaasu at na legesa radi mun.

<sup>13</sup> Nedi axap luvuttadi diga ruuna lunuunu at lorooro axap atdi se at loxonaleng diga met. Nedi goxo ruuna ka mo levempanga ne Moroa ga vaase alii min tidi, ketla diga ven avaxalom ka mo levempanga la diga momo ka i, keke i do di goxovisi ruuna ka i. La diga siam ka mun lorooro alua at na lavatbung menemen. <sup>14</sup> Limixin di paase xerepmo, i lox asuuusu i do temenemen aulis gove di puse rin. <sup>15</sup> Do nedi gove gitam doma amlong ti mo lemenemen no nedi diga on basinge i, nedi ro gitamlong pam ti mo lemenemen atdi. <sup>16</sup> Ketla lodoxoma atdi move ga vara ri temenemen avukat tinotno, mo lemenemen ik lok to vana at laxalibet. Kuren la ne Moroa i lok momo xusu dina soxor i do ne Moroa atdi mila neni ga lox agagas lemenemen tidi.

<sup>17</sup> Abaram ga ruuna lunuunu, kuren la ap mo laaleng ne Moroa ga lok tong pen i, neni ga ronga res la ga raba ne Aisak ngan laplavang. Abaram neni mo laradi ne Moroa ga vaase alii rin do livipisik li ren naba umsu aleng. Ketla melemu manga ni ga gagas kusu naplavang mi mo legesa nitna. <sup>18</sup> Ne Moroa gara tong pam i rin do, “Aisak neni laradi ba lox asilok livisik li ram.” <sup>19</sup> Abaram gaklen i do ne Moroa i epovo na lox arooro luvuttadi met; ketla ne Moroa ga sep pepe i la ni goxo sev amet ne Aisak. I lok ngan ta do ne Moroa ga lox arooro ne Aisak basinge lanmet.

<sup>20</sup> Aisak ga ruuna lunuunu, kuren la neni ga lox anarong ne Jakop mi ne Esao mi levelinga mumuat mumu mo levempanga naba ravaasu at lorooro atdu la at livipisik li bok atdu melemu at levenaleng at lanmet teren.

<sup>21</sup> Jakop ga ruuna lunuunu, kuren la neni ga lox anarong lumdak at ne Josep la ga lotu saparap ne Moroa, ap mo loxonaleng neni ga sox auru i mi lakdak teren, mila neni gara sioxo vam la ga auret levenaleng kusu neni na met.

<sup>22</sup> Josep ga ruuna lunuunu, kuren la ga auret ti lanmet teren, neni ga vaase alii do at tara taaleng limixin me Israel diba vas kaxat basinge lemenemen Isip la neni ga vaase alii bok at limixin teren kusu dinaba xip ka levesi ren do dina vas kaxat uto Kanan.

<sup>23</sup> Temen ne Moses mi nenen duga ruuna lunuunu, kuren la duga lipne Moses at lavantun gaaling melemu at livipisik teren, mila duga ven

i do mo lamdak goxopmen lamdak gamasa, ketla lamdak ga lok petpes tino, la du goxo marat at lavapaase lolos at loorong silok, ga tong i do dina sev amet axap levengkadede remes at limixin me Israel do dina visik asu di.

<sup>24</sup>Moses ga ruuna lunuunu, kuren la neni ga silok, la ni ga xopara i xusu limixin dina soxor i do lamdak at loolik at ne Parao. <sup>25</sup>Ketla neni ga vara i xusu na xip laxasongsongot eburu mi limixin at ne Moroa la neni ga xopara i xusu na lox amomo lorooro ren mi laxakapmek, mo naba xap asonao mun. <sup>26</sup>Moses ga doma i do ik mokso do neni na lok ka lainmangan eburu mi limixin teren at lugugu at Lanarong. Mo lainmangan ga lox avukat aleng ti lapnovos boro Isip, mila neni ga reven ti mo luunun move ne Moroa ba raba i min. <sup>27</sup>Neni ga ruuna lunuunu, kuren la neni ga vas kaxat basinge lemenemen Isip la goxo marat at lumukmusak at loorong silok me go, ketla neni ga tu lolos at lunuunu ren, mila neni ga ven kibis ne Moroa, mo limixin di goxo epovo na ven i. <sup>28</sup>Moses ga ruuna lunuunu, kuren la neni ga tong i ri limixin me Israel kusu dina sep ka tevempatnat sipsip la dina saba li lada ap mo laxasipsip to at laramusaragu at laraugu atdi, na loklok ga lok kaxat mo leluxa diga soxor i do Lovovolo Pe. Diga lox i na xusu mo laangelo sepsep noxo sev amet lavaanat meren at limixin me Israel. Ketla Moroa ga riki i do na sev amet lavaanat meren at limixin me Isip.

<sup>29</sup>Limixin me Israel diga ruuna lunuunu, kuren la diga vas korop Laras Memele, digat pas mun at laxangka mesemes. Ketla at loxonaleng limixin esep boro Isip diga lok tong pen i xusu dina vas polo, laras gak mit di la diga xong axap.

<sup>30</sup>Limixin me Israel diga ruuna lunuunu, kuren la lara langas uat lolos mo ga tu xangkan lemenemen silok Jeriko ga rebubuxup si ukopok. Mo lavanga ga vot melemeu at lavanuti aleng limixin me Israel digat pas kangkan mo lemenemen.

<sup>31</sup>Raap, latkin ngarangat ga ruuna lunuunu, kuren la neni goxo uu eburu minedi limixin boro Jeriko diga ronga viribang, mila neni ga lok tooro luradi esep at leme Israel mo dugakling lemenemen at laaleng ne Josua ga riki du xusu dunakling mo lemenemen Jeriko.

<sup>32</sup>Aba tong ka bok ba lavanga salai? Nia xopmen ana epovo xusu ana vaase bok ba mila loxonaleng kopmen na epovo kusu aba tong asu axap lorooro atnedi loxongkulao nuunu kerekngan ne Gidion, Barak, Samison, Jepita, Devit, Samuel, la leventaba vepes bok eburu mi lavaeme vapaase alii; <sup>33</sup>diga ruuna lunuunu, kuren la leventaba atdi diga sep kepe levenabung mixin, leventaba atdi diga lok tatao limixin atdi mi loklok mokmokso, la kerepmo ne Moroa ga lok tooro di xerekngan neni ga vaase alii min tidi; la leventaba atdi, lavamolon diga lu arup midi uto at laramet laion la lubung laion di goxo epovo na anan di, mila ne Moroa

ga vamngus lubung laion. <sup>34</sup>Leventaba atdi lavamolon diga lu arup midi uto xeneng at laxao ketla laxao goxo epovo na rin di; leventaba atdi diga ves avolo levemparise sepsep at limixin esep; la leventaba atdi levengkot atdi ga molo xetla ne Moroa ga lox alolos di; la leventaba diga ravausu ngan luvuttadi lolos tino, kuren la diga xala xepe limixin esep boro at levengkot petpes. <sup>35</sup>Leventaba lavakin diga ruuna lunuunu kuren la leventaba atnedi digara met pam, ketla ne Moroa ga lox aroo amlong bok di.

Leventaba atnedi luvuttadi nuunu, diga lok ka losongsongot kapmek tinotno, lavamolon diga lok mo leveloklok ti lok kepe lunuunu atdi, ketla diga tu lolos la diga siam ka mo laxanmumuat, mila diga nuunu do melemu diba lok ka lorooro avolo. <sup>36</sup>Lavamolon diga lok kalise xapmek leventaba atdi la digak pixis kapmek tino di, la diga koxo alis leventaba bok la diga lox abeles di at laraugu xokoxo. <sup>37</sup>Diga lu amet leventaba atdi mi laxanuat, la diga soo xorop avu leventaba atdi mi lempasoo, la diga sev amet leventaba atdi mi lemparise.

Leventaba atdi luvuttadi nuunu diga siga mun levenbantuxu sipsip la levenbantuxu me, mila kopmen tevempanga singsiga avukat atdi la di goxo ruuna tevempanga at lorooro atdi, diga xip laxasongsongot la lavamolon diga lok kapmek tinotno di. <sup>38</sup>Lavamolon diga doma i do mo limixin nuunu diga lok kapmek aleng, ketla at lemeren ne Moroa nedii limixin mokmokso, la ixo epovo do dina nemen at na lavatbung menemen. Digat pas tangtagap to at lamatbin la to at levempatkaana la diga nemen to xeneng at laxantabuang la at laramamara ro xeneng at laxangka, mila goxopmen taramenemen atdi.

<sup>39</sup>Diga ruuna lunuunu, kuren la ne Moroa ga emiasu midi, ketla tara atdi goxo lok ka mo leveloklox anarong at lekabus maxat ap mo levenaleng diga rooro ren. Mo leveloklox anarong ne Moroa ga vaase alii min ti limixin teren. <sup>40</sup>Moroa ga lox agagas lekabus maxat kusu neni na lox adadat dik. La kerepmo bok neni ga lox adadat nedik eburu minedi na limixin digap kip laxasongsongot.

### Moroa I Lox Aleeng Limixin Teren

**12** <sup>1</sup>Buaangnedi lavalabat atdik no vana at laxalibet mo di reven dik ngan laneelen di reven lekampoovo; kuren la mina ke xepe levempanga axap mo ik lox angtang lunuunu atnimi la mina ke xepe bok laxakapmek mo nemi mik sak kikixin teren, la minak sixit eburu mi lololos ap mo lekampoovo ne Moroa ga lox agagas i rinimi. <sup>2</sup>Lodoxoma atnimi na tu atkatla at ne Iesu, neni lavasuun la lurutu kaxat at lunuunu atdik. Neni ga siam ka laxasongsongot la lainmangan at laxaba mila ni ga doma mun mo lomomo neni naba ruuna ka i; la na nga neni it kis at lenep tino at loxonin orong at ne Moroa. <sup>3</sup>Mina doma mumu mo

laxasongsongot limixin kapmek diga lox i rin; at na loklok nenii lampoovo rinimi, xusu nemii mi noxo molo la mina soxope lunuunu atnimi.

<sup>4</sup>At na levenaleng mira raba arulu vam laxapmek la mira tu lolos, ketla limixin kapmek kovisi dina sev amet teventaba atnimi. <sup>5</sup>Nemen gat mita domampe mo levelinga loklox alolos, i ngan laradi i anasa ne nitna min; mo levelinga i lok keretna,

“Nuruk, nemen gat uta doxoma abulubun do ne Moroa, Leeme Silok na lox aleeng u do u lok laxapmek; la nemen gat uta bulu ap mo loklok, <sup>6</sup>mila Leeme Silok ik lox aleeng nedii, nemii i vavara aleng di. La do nemii na lox asongot nimi, ana i lox asuuus i do nemii mi lok ngan laxamdaak tinotno ren.”

*Ler 3:11-12*

<sup>7</sup>Mina tu lolos tip kip leve songsongot mi lomomo mila ne Moroa i ke xepe mo levenmumuut kusu na vot saparap nimi ri lox aleeng nimi. I lok ngan bok nade xopok at na lavatbung menemen, luvuttemen laxamdaak di lox aleeng laxamdaak atdi, do di lok tavanga i lok kapmek.

<sup>8</sup>Limixin axap di lok leveloklox aleeng. Do ne Moroa ixo lox aleeng nimi, ana i lox asuuus i do nemii xopmen laxamdaak tuturun teren, ketla nemii mi lok ngan mun laxamdaak mexalanga. <sup>9</sup>Lara lavanga bok, nedik axap di ruuna luvuttemen dik, mo diga lox aleeng dik la nedik ga lok ngangao atdi mumu mo loklok. Kuren la i lox avukat aleng do mina siam ka mo leveloklok at ne Moroa, ne Temen nimi; nemii ga rudum li dik la leventoonan atdik la kerepmo ataba ruuna ka lorooro avolo. <sup>10</sup>Luvuttemen dik diga lox aleeng dik at leventaba levenmaares mun mumu lodoxoma atdi; ketla ne Moroa i lox aleeng dik kusu ataba vee radi avukat la ataba lok ka mo loklok teren ik mokso axap. <sup>11</sup>Na leveloklok kopmen na lox amomo dik ketla i lox asongot dik. Melemu at na leveloklok, lorooro atnimi naba lok asuuus lomokmokso la lenmila do mina siam ka mo loklox aleeng.

<sup>12</sup>Kuren la mina raba axap lodoxoma atnimi xusu mina momu lavvara at ne Moroa la miba lok ka levempanga nemii ga vaase alii vam min tinimi, kerekngan laradi i lox alolos labantuxu ren kusu rik sixit at lekampoovo. <sup>13</sup>Mina lok tatao avukat lavatpas atnimi, xusu do teventaba atnimi mo lunuunu atdi xopmen na lolos, di noxo soxope axap lunuunu atdi at ne Karisito, ketla diba ven mo leveloklox avukat atnimi, la diba mu asu i la kerepmo lunuunu atdi naba lolos.

### Lavanga Mina Ronga Xepe Ne Moroa

<sup>14</sup>Mina lolos kusu mina nemen at lumulum eburu mi limixin axap, la mina nemen mokmokso, mila do tara noxo ruuna loklok mokmokso, nemii noxo ven ne Moroa at lorooro melemu. <sup>15</sup>Mina lok tatao avukat nimi xusu tara atnimi noxo sok tixirixes kepe letaba nabalamu at ne Moroa la na seeve; la nemen nimi guta ke xepe teventaba atnimi dina lok lekarakat

kusu mo laxakapmek na lox asubu lunuuunu at limixin, kerekngan laradi sak i sev amet limixin.<sup>16</sup> Mina lok tatao avukat nimi xusu tara atnimi noxo vubeles ti loklok i lok kapmek maxamang at lixitkis epot la kerepmo na lok kapmek lara kitkis epot atnimi; kopla na lok ngan ne Esaو, neni goxo lok ngangao at ne Moroa, la neni ga xip kepe laasen silok do lanarong, mila lavaanat meren digak lok ka loklox anarong at luvuttemen di; ketla neni ga xip kepe mo loklox anarong kusu ni na lok ka levempanga anan mun ti labantuxu ren.<sup>17</sup> Nemi miklen i do melemu bok ba neni ga lok do na lok ka amlong mo loklox anarong, ketla ne temen ga sok tixirixes kepe i. Neni goxo epovo na lox ekun lodoxoma at ne temen, keke i do neni ga reng mu mo loklox anarong.

<sup>18</sup> Do mina vosiga ne Moroa, mi noxo ven mo levempanga limixin me Israel diga ekip tangarang min at lavatpas atdi boro Isip. Diga vot to at lakaana Sinai la ne Moroa ga sep pepe di do di noxo long tu ren; la diga ven mo lakaana, laxao silok ga anan teren, la lamain silok mi lusugao ga vung kimir i; langsangan lamanman ebura mi leretepaavat la lavanga ga mam to ap mo lakaana.<sup>19</sup> La diga ronga lerengteng at luru la diga ronga laxaka at ne Moroa. Diga ronga i na, la diga marat aleng la diga sing i xusu noxo vaase bok ba tevelinga ridi.<sup>20</sup> Di goxo epovo na ronga ne Moroa mila diga marat aleng at levelinga ren, ni ga lok keretna, “Limixin axap gi noxo long tu at na lakaana, la do tavanga mi lavanuet kangkedek teren na los polo na levelinga rak, limixin dina lu amer i.”<sup>21</sup> Diga ven i mo lavanga la diga umsu mi lanmarat, kuren la ne Moses ga lok, “Nia a marat aleng, kuren la a dede.”

<sup>22</sup> Ketla nemi mi goxo ekip tangarang mi tevempanga xeretna at lovotpot atnimi saparap ne Moroa. I lok ngan ta do mira vot pam to saparap lakaana Saion la lemenemen Jerusalem, neni lemenemen at ne Moroa, mo i rooro. Mira vot pam ap mo lemenemen i umsu aleng mi lubung angelo, kopmen tara i epovo ri exes di, mo dik lok buru la dik pixan emi asu saparap ne Moroa.<sup>23</sup> La mira vot ebura vam mi limixin nuunu nedii lavanarong at ne Moroa, mo ga malagan li vam levenasen atdi ro vana at laxalibet. Mira vosiga bok pam ne Moroa, neni laradi rongtonga linga at limixin axap, la mira vot pam saparap labaroonan atnedi limixin mokmokso no digara met pam la ne Moroa ga lox addadat pam di la na nga dik lok to vana at laxalibet.<sup>24</sup> Mira vosiga vam ne Iesu, neni ga lok lumulum ti lekabus maxat kantubu at ne Moroa ebura mi limixin, la mira vot pam ap mo loxot ne Iesu ga semla li lada ren to melamgo at ne Moroa ngan luunun ti laxakapmek at limixin. Mo lada ren i lox avukat ti lada at ne Abel, mila lada at ne Abel ga lox asuusu lumukmusak at ne Moroa ketla lada at ne Iesu i lox asuusu lumulum.

<sup>25</sup> Mina lok tatao avukat nimi xusu mi noxo ronga xepe ne Moroa, mo i paase rinimi. Moroa ga paase ri lavalabat atdik to Sinai, ketla

buaang atnedi diga ronga xepe levelinga ren la diga ekip tangarang mi lebelemamao ren. La kerepmo bok, do nemi mina ronga xepe levelinga at ne Moroa no vana at laxalibet, ixo epovo do mina sepsu at lebelemamao ren, mila levelinga ren tidik i mumuat aleng ti mo levelinga neni ga raba di min. <sup>26</sup> Ap mo levenaleng Moroa ga paase ri lavalabat atdik to Sinai, la lavatbung menemen axap ga dede. Ketla melemu neni ga vaase do, “Abangma gesara bok na lavatbung menemen eburu mi laxalibet.” <sup>27</sup> Na levelinga do “gesara bok,” i loxasuusu i do ne Moroa naba sele utut kepe axap levempanga neni ga rudum li di at na lavatbung menemen la laxalibet bok, kusu mo levempanga neni i vara i do nak lok, naba nemen amisik.

<sup>28</sup> Nedik ata lok ka lixitkis at Lintoo ren mo noxo xap, kuren la ata tong avukat ti ne Moroa la ata lotu ruturun saparav i, la lorooro atdik na umsu mi langsangan loklok ngangao saparav i, <sup>29</sup> mila ne Moroa atdik neni laxao sesele utut.

### Levelinga Xavaxap

**13** <sup>1</sup>Mina balamu ela nimi mila nemi limixin at ne Moroa. <sup>2</sup>Nemen mita ke xepe loklok ti lok maraose mi luvuttadi xadiong. Leventaba diga mu asu na loklok, ketla di goxoklen i do diga lok maraose mi lubung angelo at ne Moroa. <sup>3</sup>Mina loxasuusu labalamu atnimi rinedi limixin nuunu di nemen at loxokoxo, i lok ngan ta do nemi bok mik lox eburu midi at loxokoxo; la mina lok tooro limixin nuunu mo dip kip losongsongot mumu lunuunu atdi, mila nemi bok migap kip levensumumat kerepmo.

<sup>4</sup>Nemi axap mina mu asu avukat loklok keneng at leepot la mina ke loklok ti elongka mila neddi di mu asu loklok ti elongka, Moroa naba lok li di at lavapaase, eburu minedi bok limixin di los polo levelinga at ne Moroa mumu loklok keneng at leepot. <sup>5</sup>Mina ke xepe loklok ti vavara solo levempilas la mina lok momo mi mo levempanga mi ruuna i, mila ne Moroa ga lok keretna,

“Nia noxo on basinge rinotno nimi la loklok tatao rak kopmen tinotno noxo xap.” *Len 31:6*

<sup>6</sup>Kuren la i epovo do ata tong tuturun mo levelinga kerekngan Lovoang Kaala i tong i,

“Moroa neni laradi loklok tooro rak, kuren la nenia anoxo marat mila ixo epovo do limixin dina lok kapmex ia.” *Sam 118:6*

<sup>7</sup>Mina doma loklok at luvuttadi amgomgo atnimi gano, mo diga vaase nimi mi Lagale Lavavang at ne Moroa. Mina doma lunuunu diga ruuna i at lorooro atdi se diga met, la mina lok ka lunuunu xerepmo. <sup>8</sup>Diga nuunu do ne Iesu Karisito ixok lox ekun levelinga ren; levelinga ren ga sorun gano la i sorun lingina la naba sorun bok melemu.

<sup>9</sup>Nemen gat mitang tonga ned i lox ase nimi mi levenanasa vetpes, mo ba sar asoogong nimi basinge lunuunu atnimi at ne Iesu. I lox avukat do mina lok ka letaba nabalamu eburu mi loklok tooro at ne Moroa xusu mina lox alolos lebelen nimi. La mina ke xepe mo leveloklok at Lenavolo mumu leveluxa salai ri anan la leveluxa salai kopmen ti anan; na loklok noxo lok tooro lorooro atnedi di mumu asu i. <sup>10</sup>Ketla nedik ta ruuna laradi loklox arooro; ni ga lox epovo luunun ti laxakapmek atdik la kopmen toxot at na rinedi di mumu asu lekabus migomgo.

<sup>11</sup> At leventaangas at lekabus migomgo lamaasa gomgo ga lok ka lada at levempanga mi lavanuet kangkedek la ga vubeles min uto xeneng at loxot ga xaala aleng. Mo lada ga lok ngan laplavang ti laxakapmek at limixin. Ketla diga lok ka mo levempanga mi lavanuet kangkedek la diga rin asonao i ro maxamang at lemenemen. <sup>12</sup>La kerepmo ne Iesu bok ga xip losongsongot to maxamang at lemenemen silok Jerusalem kusu na lox adadat limixin basinge laxakapmek mi lada xa ren. <sup>13</sup>Kuren la mina xis esogo mi ne Iesu, la minap kip lainmangan kerekngan ne Iesu gap kiv i ap mo laaleng neni ga merem at laxaba ro maxamang ap mo lemenemen, <sup>14</sup>mila kopmen temenemen tino ridik nade xopok at lavatbung menemen, ketla nedik ta ngangais ti mo lemenemen ne Moroa ga lox agagas li i ridik.

<sup>15</sup>Iesu ga uu ngan laxaavuk tidik, kuren la ata emi asu amisik mi ne Moroa, i lok ngan laplavang atdik tin la i lok ngan bok livipisik atnedi di nuunu at laasen teren. <sup>16</sup>La nemen mita domampe loklok tik lok lununuan la loklok tim taba panga ned i dik pakes, mila ana leveloklok i lok ngan laramtaba atdik ti ne Moroa la neni i momo ren.

<sup>17</sup>Mina ronga res at luvuttadi amgomgo at lotu la mina mu asu levelinga atdi mila ned i lok tatao nimi la ne Moroa nabakling lugugu atdi, mo do diga lok tatao avukat nimi. Mina ronga res atdi xusu diba lok momo mun at lugugu atdi. Do mina ronga xepe levelinga atdi, na loklok ting tonga xepe naba lok li lumumuat mavana atdi la naba lok kapmek lunuunu atnimi.

<sup>18</sup>Mina ngising amisik ne Moroa do neni na lok tooro nama. Nema xopmen mana ruuna tusumsuma xapmek mila maklen i do lebelen nama ip sepsen tino, la ma vara aleng i do mana ruuna luruptuvuk i nunuan axap. <sup>19</sup>A vara i xusu anamlong posiga soso nimi, kuren la at langsangan lavavara rak, do mina sing ne Moroa ri na lavanga.

<sup>20</sup>Moroa at lumulum ga lox aroo amlong Leeme Silok atdik ne Iesu basinge lanmet; la at lada ren neni ga vaxaru kaxat lekabus maxat mo ba nemen amisik. Neni laradi loklok tatao atdik ngan laradi i lok tatao lubungipsip teren. <sup>21</sup>A sing ne Moroa do na lox agagas avukat nimi xusu minaba mu asu lavavara ren la neni na gugu at lebelen nimi xeneng at loklok tooro at ne Iesu Karisito. Ata ba lok mo levempanga neni naba momo ren la ata emi asu min la na leemi asu rin noxo xap. Tuturun.

<sup>22</sup>Luvutnetak mi luvurinuk. Nia a sing nimi do mina siam ka levelinga rak keneng at na lovoang. Na levelinga kopmen na baalom solo, i xubulik mene nga.

<sup>23</sup>A vara i xusu minaklen i do neton dik ne Timoti diga soxomus asu vam i boro xeneng at loogu xokoxo. Do nenii na vot pasa soso ia, nema eburu manaba vosiga nimi.

<sup>24</sup>A lox aanon lavapaase momo rak ti luvuttadi amgomgo atnimi la ti limixin axap at ne Moroa. La nedii bok limixin nuunu boro Itali di lox aanon lavapaase momo rinimi.

<sup>25</sup>Letaba nabalamu at ne Moroa na nemen amisik eburu minemi axap. I ruturun.